

# Doktrina di Spiritu Santu

## (Numatologia)

E palabra “numatologia” ta formá di dos palabra griego. LOGIA ta nifiká “estudio di”. E palabra NUMA tin nifikashon idéntiko ku e palabra hebreo RUACH. Tur dos palabra por tin diferente nifikashon:

E idea básiko di NUMA ta un kos: aire, brisa, movimentu di aire, bientu òf rosea. Tèstament Nobo ta usa e palabra NUMA den e forma aki. “**Bientu** ta supla unda ku e kier...” (Juan 3:8). “...e malbado...kende Señor lo destruí ku e **rosea** di Su boka...” (2 Tesalonisensenan 2:8). Dos Timoteo 3:16 ta usa un forma di NUMA ora e ta bisa ku “*Tur Skritura ta **inspirá** pa Dios...*” Literalmente e teksto ta bisa ku “Tur Skritura ta rosea di Dios...”

E di dos manera ku e palabra NUMA ta usá den Tèstament Nobo, ta di e spiritu humano. Esaki por wòrdu deskribí diferente manera. 1) E ta e parti di hende ku ta konsientis’è di loke ta spiritual—es ta e parti di e ser humano ku ta sensíbel pa ku Dios. Romanonan 8:16 ta bisa ku “*E Spiritu mes ta duna testimonio huntu ku nos **spiritu** ku nos ta yu di Dios.*” Segun e teksto aki Spiritu Santu ta ministrá pa ku e spiritu humano. 2) E ta e parti pa medio di kua hende ta sinti, pensa, desea, èts. —similar ku e alma. “*Pasobra ta ken konosé e pensamentunan di un hende, sino e hende su **spiritu** ku ta den djé?*” (1 Korintionan 2:11). Hende tin konosementu propio dor di su spiritu. 3) E parti ku ta duna bida na e kurpa. Talbes Génesis 2:7 ta duna indikashon mas kla di esaki. Dios a supla “*rosea* (e palabra hebreo, RUACH) *di bida*” den nanishi di hende pa e biba. Ora e rosea ei ta sali di e persona, e ta muri. Biniendo bèk na e palabra griego, NUMA, e ta usá den Santiago 2:26, “...e kurpa *sin **spiritu** ta morto...*” Un otro ehèmpel di esaki ta ora Hesus a muri: “...*El a baha Su kabes i a entregá Su **spiritu***” (Juan 19:30).

NUMA ta usá tambe di sernan spiritual, real, ma invisible pa bista di hende. 1) E ta usá di angelnan. “*I di e angelnan E ta bisa: ‘Kende ta hasi Su angelnan **bientu**, i su sirbidónan flam di kandela’*” (Hebreonan 1:7). 2) E palabra griego ta usá di demoñonan, yamando nan “***spiritu impuru***” den Lukas 11:24. 3) I Satanas ta yamá “...e ***spiritu** ku ta obra awor den e yunan di desobedensia*” (Efesionan 2:2).

Un otro manera ku NUMA ta usá, ta pa deskribí e persona di Dios. Dios ta un Ser bibu—no un masa di nada ku ta zuef den espasio. E ta un Ser inmaterial i invisible. Pues, Beibel ta komuniká ku “*Dios ta **spiritu***” (Juan 4:24).

E di sinku manera ku NUMA ta usá den Tèstament Nobo ta pa referí na e di tres persona di e Trinidad divino, Spiritu Santu. Esaki ta e NUMA (griego) i RUACH (hebreo) ku nos lo studia...doktrina di Spiritu Santu!

### A. IMPORTANSIA DI E DOKTRINA DI SPIRITU SANTU

Pakiko ta importante pa studia e doktrina aki?

1. Esaki ta Era di Spiritu Santu

Nos no por bisa esaki na un forma kategóriko. Ma segun algun studiante di Beibel, Tèstament Bieu tabata era di Dios Tata, pasobra ta Su obranan ku ta destaká. Tabata era di Dios

Yu den e Evangelionan. Hesus Su palabranan i obranan ta sobresalí. Nos era aktual, kuminsando ku Pentekostes te awendia, Spiritu Santu Su obranan ta prominente, i pues, esaki ta era di Dios Spiritu.

E teoria ei ta zona bunita, ma ta muchu simplista, pasobra tur tres miembro di Trinidad ta aktivo den tur era. Ma sigur ta di suma importante pa kristiannan ta konsiente ku Spiritu Santu ta obrando awendia. I lastimamente, algun kreyente ta ignorante di Spiritu Santu. Esei no por!

## 2. Esaki ta Era di Konfushon Tokante Spiritu Santu

Entre kreyentenan tin hopi konfushon awendia tokante Spiritu Santu. Por bisa ku tin dos ekstremo. a) Algun grupo kristian ta pone demasiado énfasis riba Spiritu Santu—komo sifuera doktrina di Spiritu Santu ta e úniko doktrina importante den Beibel. Na nan konsepto, Spiritu Santu ta obrando tur kaminda—asta hasiendo kos ku di bèrdad ta kontradisí Skritura. E otro ekstremo ta ku b) algun grupo kristian ta ignorá Spiritu Santu. Nan ta ignorá Spiritu Santu pasobra pa un òf otro motibu. Talbes nan ta ignorante di loke Beibel ta siña di Su persona. Kisas nan ta ignorá Spiritu Santu komo un reakshon kontra e énfasis demasiado ku algun grupo ta pone riba Spiritu Santu.

Nos ke mantené un balans bíbliko. Nos ke evitá tur dos ekstremo! Pa hasi esei, nos mester studia loke Skritura ta bisa tokante Spiritu Santu.

## 3. Esaki ta Era di Spiritunan

Spiritismo, bruheria, montamentu, hende poseé di demonio, èts. ta bira mas i mas komún. Hopi spiritu ta sumamente aktivo awendia. Satanas i su kompinchinan ta obrando den nos era. Nos por nota tur klase di siñansa falsu, obra falsu, norma falsu, èts. I tristu ta ku awendia hopi hende ku ta yama nan mes “kristian” ta falta discernimentu i ta aseptá e spiritu robes! Nos mester konosé e Spiritu di Dios pa nos por disitiguí kua spiritu ta—i kua spiritu no ta—di Dios. Apòstel Juan a spierta nos tokante esaki: “*Stimánan, no kere tur spiritu, ma pone e spiritunan na prueba pa mira si nan ta bin di Dios; pasobra hopi profeta faltu a sali bai den mundu*” (1 Juan 4:1).

## 4. Sin Spiritu Santu ta Impusíbel pa Hiba un Bida Kristian i Sirbi Dios

Hopi kristian tin e impreshon, “Mi tin mester di Dios Su obra pa salvámi. Ma despues di salbashon, mi mes por biba e bida kristian.” Esei ta un pensamentu totalmente kiboká. E bida kristian ta un bida sobrenatural. Ningun kreyente por biba e bida kristian manera debe ser sin e presensia i poder di Spiritu Santu!

## **B. DIFIKULTATNAN PA KOMPREDÉ E DOKTRINA DI SPIRITU SANTU**

Komo studiante di Skritura, nos tin ku tene kuenta ku algun problema relashoná ku e doktrina aki. Nos lo menshoná dos:

### 1. Tin Ménos Revelashon Tokante Spiritu Santu den Skritura ku e Otro miembronan di Trinidad

Nos sa hopi, espesialmente for di Tèstament Bieu, tokante Dios Tata. Nos tambe ta haña sa hopi tokante Dios Yu, espesialmente den e Evangelionan. Ma kompará ku e Tata i Yu, e informashon tokante Spiritu ta skars.

Un pusíbel motibu pa esaki ta pasobra Spiritu a bin pa glorifiká Kristo. “*E lo glorifikáMi; pasobra E lo tuma for di loke ta di Mi, i lo revelá esaki na boso*” (Juan 16:14). Pues, intensionalmente Spiritu Santu no ta asina prominente pasobra E ke halsa Kristu Hesus!

### 2. E Imagen Mental di Spiritu Santu ta Mas Difísil pa Visualisá ku e Imagen Mental di e Otro Miembronan di Trinidad

Nos por komprendé Dios Tata, pasobra ta fásil pa hende kapta imagen di un tata. Nos tambe por komprendé Dios Yu. Ora Dios Yu a bira un ser humano, hende por a mir’É, tend’É, mishi kunÉ. Pasobra El a bira hende, ta fásil pa komprendé hende. Ma kompará ku e Tata i Yu, ta difísil pa hende komprendé Dios Spiritu. Hende ta pensa di spiritu komo un spoki, no un ser personal!

Nos mester hasi e estudio aki tokante Dios Spiritu, realizando e limitashon aki di nos komprendmentu.

### **C. DESAROYO DI E DOKTRINA DI SPIRITU SANTU**

Normal, un doktrina no ta desaroyá te ora hende ta duda, nenga òf revisá loke tabata aspetá komo doktrina korekto. Ora un pregunta asina ta lamta, ta na su lugá pa kreyentenan bai bèk na Skritura i studia e sierto aspekto ei di e doktrina na plaka chiki pa determiná kiko presis Beibel ta bisa.

Esei ta e kaso ku doktrina di Spiritu Santu. Numatologia no a desaroyá masha te último siglo. Laga nos nota un historia kòrtiku di e doktrina aki.

Durante era di iglesia antiguo, poko a wòrdu papia òf skirbí tokante Spiritu Santu. Poko poko a bin mas énfasis riba e divinidat di Spiritu Santu. Ma maske nan a ador’E, tòg nan no tabata sigur tokante Su puesto komo Dios. Tertuliano (155-220 A.D.) a siña ku Spiritu Santu ta divino i a introdusí e palabra “Trinidad”. Ma ainda a keda hopi debate si Spiritu Santu ta Dios. Kredu di Nicea (325 A.D.) a deklará ku Hesus i e Tata ta Dios, ma no a bisa nada tokante divinidat di Spiritu Santu. Atanasio (295-373 A.D.) a konkretisá e siñansa tokante e divinidat di Spiritu Santu. El a insistí ku Spiritu Santu ta kompletamente divino i igual ku e Tata i Yu.

Tòg a keda diferente punto di bista. Segun algun, E ta un forsa òf kriatura. Algun a nenga forma opinion. Durante síglonan skur (476-1450 A.D.) tabatin poko énfasis riba Spiritu Santu. Asta e Reformashon (siglo 16) no a trese e doktrina aki na klaridat. Durante siglonan 18 i 19, tabatin kampañanan evangelístiko na Merka enfatisando ku arepintimentu i konbertimentu ta e obra di Spiritu Santu. Esaki a kuminsá konsientisá hende di Spiritu Santu.

Na siudat di Topeka, Kansas, Merka, Charles Parham, dirigente di un skol di Beibel chikitu, mester tabata ousente pa un tempu. Durante su ousensia, e studiantenan a haña tarea pa konsentrá riba e tópiko “boutismo di Spiritu Santu.” Ora Parham a regresá, e studiantenan a duna di konosé ku nan ta di akuerdo ku Beibel ta siña ku un un kristian mester ta boutisá ku Spiritu Santu despues di salbashon i ku e don di lenga ta e indikashon ku esei a sosodé. Dia 1 di yanüari 1901, un estudiante, Agnes Ozman, a pidi Parham pa pone man riba dje i hasi orashon pa e risibí e boutismo di Spiritu Santu. Segun Agnes, ora el a hasi esaki Spiritu Santu a bin riba dje i el a hasi orashon na vários idioma ku e no tabata konosé. Otronan di e grupo tambe tabatin e mésun eksperensia. Historiadónan ta konsiderá e fecha ei komienso di e movimiento Pentekostal. Esaki a sigui plama dor di William Seymour ku tabata prediká na Azusa Street na Los Angeles na Merka.

Pues siglo 20 tabata komienso di e énfasis tan pisá riba doktrina di Spiritu Santu. E eventonan aki di último siglo a obligá kreyentenan pa studia Numatologia atrobe pa dedusí kiko presis Beibel ta bisa tokante Spiritu Santu.

Ku e introdukshon aki, nos ta prepará awor pa kuminsá studia loke Beibel ta bisa tokante Spiritu Santu.

### **I. NATURESA DI SPIRITU SANTU**

Ora nos ta papia tokante Spiritu Santu, no tur hende—asta no tur kristian—no ta di akuerdo kiko presis nos ke men. Asta nan no sa si Spiritu Santu ta un “kiko” òf “ken”. P’esei ta importante pa inisiá nos estudio aki dor di pensa tokante e naturalesa di Spiritu Santu.

Beibel ta siña dos bèrdat importante tokante Su naturalesa...loke nos ke studia awor: 1) E personalidat di Spiritu Santu i 2) E divinidat di Spiritu Santu

#### **A. E PERSONALIDAT DI SPIRITU SANTU**

E pregunta ku nos tin ku kontestá aki ta, “Kiko Spiritu Santu ta?” Nos lo bisa frankamente na komienso ku nos ta rekonosé ku Spiritu Santu ta un persona. Ma tin hopi religion i asta algun kristian ku no ta aseptá esei.

### 1. Sektanan i Spiritu Santu Su personalidat

Nos por menshoná diferente sekta. Ma talbes, esnan ku nos ta menshoná aki ta esnan mas prominente na nos islanan:

#### a. Panteísmo

Panteísmo ta e kerensia ku tur kos ta Dios i Dios ta tur kos. Pues, Dios no ta un persona. Religionnan di oriente ta yen di panteísmo i ta infiltra den nos komunidat poko poko. New Age, ku su raisnan firmemente den religionnan di oriente (hinduismo) ta kere den panteísmo. Pues, Spiritu Santu no por ta un persona...si e ta eksistí mes...

#### b. Tèstigunan di Jehová

Tèstigunan di Jehová ta nenga e doktrina di Trinidad. Nan a asepta ku Dios ta ún solo Ser, ma Hesus i Spiritu Santu no ta Dios. Segun nan, Spiritu Santu ta un “influensia di Dios.” Nan wepsait ta bisa, “Spiritu santu ta Dios su poder den akshon, su forsa aktivo. (Mikeas 3:8; Lukas 1:35) Dios ta manda su spiritu dor di proyektá su energia kualke kaminda ku e ke kumpli su boluntat.—Salmo 104:30; 139:7.” Rais di e doktrina aki di Tèstigunan di Jehová por wòrdu haña den historia di iglesia antiguo serka Arius (250-336 A.D.) ku a siña ku Spiritu ta “e energia ku Dios ta usa.”

### 2. Dudanan pa ku Spiritu Santu Su personalidat

Tin hende ku ta duda si Spiritu Santu ta un ser. Asta algun kreyente ta duda Spiritu Santu Su personalidat. Pakiko tin tantu interogante riba e punto aki? Básikamente tin tres motibu.

a. Spiritu Santu ta parse impersonal kompera ku e Tata i Yu. Nos a mira esaki kaba. Ta fásil pa komprende e imagen mental di un tata. Pues, no ta difisil pa asepta Dios Tata. Pasobra Dios Yu a bira humano, tabata fásil pa hende komprende un otro ser humano. Ma e imagen mental di Dios Spiritu ta keda algu misterioso, invisibel, sekretu...un spoki!

b. E palabra griego NUMA (tambe e palabra hebreo RUACH) por referí na algu sin personalidat. E palabra NUMA ta ni maskulino ni femenino. E ta neutral...i pues, ta parse un “kos”. Na Papiamentu nos no ripará esaki pasobra e palabra “e” por ta maskulino, femenino òf neutral. (Hulandes ta mas spesífiko [hij, zij, het] i tambe ingles i spañó.) Tin ora un tradukshon di Skritura ta tradusí NUMA na forma neutral (het, it) na lugá di maskulino (hij, he, el), dunando impreshon ku E ta un kos. (Esei ta e kaso ku King James Version (ingles) den Romanonan 8:16,26). Ademas, NUMA i RUACH tambe por nifiká rosea, bientu, èts.—un kos.

c. E di tres motibu ku por tin duda si Spiritu Santu ta un persona ta pasobra tin ora Spiritu Santu no ta inklui den algun teksto ku ta menshoná e otro miembronan di Trinidad, manera Filipensenan 1:2 i 1 Tesalonisensenan 3:11.

### 3. Pruebanan pa ku Spiritu Santu Su personalidat

Ma nos foko ta riba Spiritu Santu Su personalidat. Ku esei, nos ke men ku Spiritu Santu ta un ser, un persona.

Ta bon pa nos para ketu i klaria kiko “Spirtu Santu ta un persona” ta nifiká, pasobra e deklarashon ei mes por trese konfushon. Nos mester komprende bon kla ku esei no ke men ku E ta un persona den e mésun sintido ku un hende ta un persona. Sigur esaki no ta nifiká ku Spiritu Santu ta humano. Ora nos ta bisa ku Spiritu Santu ta un persona, esaki simpelmente ta nifiká ku Spiritu Santu ta un ser...no un kos. E no ta un poder, un influensia, un spoki misterioso. E ta un ser—un persona ku tin personalidat. I en kontraste di hende ku tin personalidat imperfekto, pasobra E ta Dios, E tin personalidat perfekto.

Ki evidensia tin den Skritura ku pa Spiritu Santu Su personalidat?

a. Pronòmbernan personal ta usá di Spiritu Santu. Nos a mira ya kaba ku e palabra griego, NUMA, ta un palabra neutral (ni maskulino, ni femenino). Segun gramatika griego, mester tin un pronòmber neutral ku un palabra neutral. (Igualmente, un pronòmber maskulino mester harmonisá ku un palabra maskulino, i un pronòmber femenino mester harmonisá ku un

palabra femenino.) Ma echu ta ku tin ora Skritura ta ignorá e regla di gramatika griego i ta usa un pronòmber maskulino ku NUMA (neutral). Ripará algun ehèmpel di esaki (maske tin ora ta difísil pa mira esaki na Papiamentu dor ku nos ta usa “e” tantu pa un kos komo pa un persona).

“*Ma e Konsolador, Spiritu (NUMA) Santu, Kende e Tata lo manda den Mi nòmber, E lo siña boso tur kos i hasi boso rekòrdá tur loke Mi a bisa boso*” (Juan 14:26). Den e teksto aki “E” ta e palabra griego EKEINOS, un pronòmber maskulino ku ta nifiká “hij” (Hulandes), “he” (Ingles). Ta méskos den Juan 16:13-14: “*Ma ora ku E, e Spiritu (NUMA) di bèrdat, bin, E lo guia boso den tur bèrdat; pasobra E lo no papia di Su mes, ma tur loke E tende, E lo papia; i loke tin di bin, E lo revelá na boso. E lo glorifiká Mi...*” E promé “E” den 16:13 ta e mesun palabra griego EKEINOS. I ta méskos ku e promé “E” den 16:14. Den e kasonan ei, e tradukshon korekto atrobe ta “hij” (Hulandes), “he” (Ingles). Den Efesionan 1:14, traduktornan di Beibel Santu na Papiamentu a skohe pa usa e palabra “Kende” (e palabra griego OS) pasobra e palabra ei ta referí na personalidat. “*Kende ta e garantia di nos erensia...*” klaramente ta referí bèk na Spiritu Santu den 1:13. Echunan 13:2 tambe ta interesante pasobra einan Spiritu Santu ta yama Su mes “Mi.” “*Apartá pa Mi Barnabas i Saulo pa e trabou pa kual Mi a yama nan.*” Si Spiritu Santu no ta un persona, dikon e teksto griego ta usa pronòmbernan ei?

b. Algun persona lo argumenta ku “spiritu” no ta usá na un forma literal, ma na un forma simbóliko. Pues, “spirit” por nifiká poder, bientu, influensia, èts. Talbes ta pusíbel pa interpretá “spiritu” simbólikamente den algun teksto. Ma echu ta ku no ta pusíbel pa interpretá tur Skritura tokante Spiritu Santu asina. No ta pusíbel pa bisa ku e palabra NUMA ke men un influensia, poder òf energia tur biaha. Dikon?

Ku frekuensia Beibel ta usa lenguahe simbóliko. Por ehèmpel, Skritura ta usa poesia den Salmonan i hopi otro teksto. Poesia por ta yen di lenguahe simbóliko. Ma Beibel no ta prinsipalmente un buki poétiko. E ta mas bien un buki históriko i legal. E Evangelionan ta klaramente un relato históriko—ku kasi nada di poesia. Ta infrekuente ku Pablo su kartanan ta usa poesia. Ta interesante ku hopi di e tesktonan ku ta papia di e personahe di Spiritu Santu, ta presisamente tekstonan ku no ta usa hopi lenguahe simbóliko, i pues no ta referí na Spiritu Santu simpelmente komo un influensia òf poder (den un sintido simbóliko).

Hopi teksto ku ta mensioná Spiritu Santu lo ta lokura si nos ta interpretá nan komo lenguahe simbóliko—komo un kos (influensia, poder, èts.) Hopi biaha Skritura ta hasi distinsjon entre Spiritu Santu i Su poder. Ripará kon ridíkulo e siguiente tekstonan lo keda si nos remplasá e palabra “spiritu” ku e palabra “poder”:

- Echunan 10:38 lo bisa “*Boso sa di Jesus di Nazaret, kon Dios a ungi E ku poder (na lugá di ‘Spiritu Santu’) i ku poder...*”
- Romanonan 15:13,19 – “*...pa boso por abundá den speransa pa medio di e poder di poder (na lugá di ‘Spiritu Santu’) “...den e poder di señalnan i maraviyanan, den poder di e poder (na lugá di ‘Spiritu’)...*”
- 1 Korintionan 2:4 – “*I mi mensahe i mi predikamentu no tabata ku palabranan pèrsuasivo di sabiduria, ma ku demonstrashon di e poder (na lugá di ‘Spiritu’) i di poder.*”
- Mira tambe Lukas 1:35 i 4:14

Klaramente, nos no por komprendé “spiritu” den e tekstonan aki komo un poder, forsa òf influensia. E ta muchu mas ku esei.

c. E echu ku Spiritu Santu ta yamá PARAKLETOS ta e di tres evidensia ku ta muestra ku Spiritu Santu ta un persona. E palabra griego PARAKLETOS no por ta tradusí komo un verbo “pa konsolá”. PARAKLETOS mester ta tradusí komo e persona ku ta konsolá, pues, e “konsoladó”. PARAKLETOS ta tradusí asina—pa referí na un persona—den Juan 14:16,26; 15:26; 16:7 unda e ta yamá “Konsolador.” Den 1 Juan 2:1, PARAKLETOS ta tradusí “Abogado”—un persona. Pues, sin duda e palabra PARAKLETOS ta referí un persona.

d. Spiritu Santu ta asosiá ku otro personanan. Hopi hende ta gusta kacho. Pero maske kuantu ku nan ta gusta kachó, nan no por tin kontakto será òf íntimo ku kacho manera nan por tin ku hende. Un persona por tin kontakto será i ta asosiá ku un otro persona. Kachó no ta komprendé ku un persona ta komprendé. Igualmente, Spiritu Santu ta asosia ku personanan—no kosnan impersonal (bientu, brisa, aire, rosea), indikando ku Spiritu Santu tambe mester ta un persona.

Spiritu Santu tin asosiashon ku e Tata i Yu. Si e Tata i Yu ta personanan, ta lógiko ku e otro nòmber menshoná huntu ku nan ta di un persona tambe (no un poder, kos, bestia, èts.). E siguiente tekstonan ta menshoná Spiritu Santu huntu ku e otro dos Person divino: Mateo 3:16-17; 12:28; 28:19; 2 Korintonan 13:13; 1 Pedro 1:2; èts. Méskos ku e Tata a manda e Yu den mundu, igualmente e Tata a manda e Spiritu Santu den mundu, segun Juan 14:16,26; 15:26

Spesífikamente, nos por mira Su asosiashon ku e di dos miembro di e Trinidad divino, Hesu-Kristu. Un meta ku Kristu tabatin ora El a bin na mundu tabata pa glorifiká un otro miembro di e Trinidad, Su Tata. Segun Juan 17:4, El a logra Su meta: “*Mi a glorifikáBo riba tera.*” Spiritu Santu tambe a bin pa glorifiká un otro miembro di e Trinidad, e Yu. Hesus papiando di Spiritu Santu den Juan 16:14 a bisa ku “*E lo glorifikáMi...*” Ta lógiko ku si un persona a bin pa glorifiká un persona den kaso #1, anto den kaso #2 tambe lo ta un persona ku ta glorifiká un persona.

Ademas ta interesante pa nota ku Hesus a laga sa ku E ta idéntiko ku Spiritu Santu. Nos no tin duda ku Hesus tabata un persona. E persona, Hesus, papiando ku Su disipelnan a bisa ku E lo manda un Konsolador *identiko*. “*I lo Mi pidi e Tata, i E lo duna boso un otro Konsolador, pa E keda serka boso pa semper*” (Juan 14:16). Na idioma griego, tin dos diferente palabra pa “*otro*”. E palabra HETEROS ta usá na griego ora e persona ta papia tokante algu ku ta kompletamente otro. En kontraste, si un hende ku ta papia griego ta papia tokante algu ku ta otro, ma idéntiko, e lo usa e palabra ALLOS. Por ehèmpel, si Buchi tin un buriku i e ta bisa ku e ta bai kumpra un otro medio di transporte, si e ta usa e palabra HETEROS, Buchi por kumpra un outo, bròmfit, òf baikel. Ma su Buchi, parando banda di su buriku fiel, ta bisábo ku e ta bai kumpra un otro medio di transporte, i e ta usa e palabra ALLOS, bo por sa ku Buchi lo kumpra un otro buriku. Ora Hesus a bisa ku E “*...lo Mi pidi e Tata, i E lo duna boso un otro Konsolador...*”, El a usa e palabra griego ALLOS. Si Hesus, un persona, ta pidi e Tata pa manda un otro ser idéntiko, ta rasonabel pa konkluí ku Esun ku e Tata ta manda tambe lo ta un persona!

Den e mésun konteksto aki, nos por nota un argument di un otro ángulo. Mateo 12:32 ta laga sa ku ofensanan kontra Spiritu Santu ta pió ku ofensanan kontra Hesus: “*Ken ku papia un palabra kontra e Yu di Hende, esei lo wòrdu pordoná na dje; ma ken ku papia kontra Spiritu Santu, esei lo no wòrdu pordoná na dje, ni den e siglo aki, ni den e siglo ku ta bin.*” Si nos ta bisa ku Hesus ta Dios i Spiritu Santu ta solamente e poder òf influencia di Dios, anto nos tin ku konkluí ku Mateo 12:32 ta bisa ku ta pió pa papia kontra poder i influencia di Dios ku pa papia kontra Dios mes! Esei lo ta un konklushon absurdo! Si e úniko teksto ku nos tabatin tokante Spiritu Santu ta loke nos ta haña den Mateo 12:32, anto nos lo mester konkluí ku Spiritu mester ta igual òf mas importante ku Hesus!

Ademas Echunan 15:28 ta bisa ku “*...a parse bon na Spiritu Santu i na nos pa no por karga mas pisá riba boso...*” Kon hende por tin unidat di opinion ku Spiritu Santu si Spiritu Santu no ta un persona méskos ku hende (personanan)? Ta opvio ku un poder òf bientu no por bai di akuerdo ku hende!

e. Di sinku manera ku nos por mira ku Spiritu Santu ta un persona ta pasobra E tin karakteristikanan esensial di personalidat.

E promé karakteristiká esensial di personalidat ta mente—es ta inteligensia. Romanonan 8:27 ta demonstrá ku Spiritu Santu ta pensa: “*i Esun ku ta skudriña e kurasonnan konosé e mente di Spiritu Santu...*” Tambe 1 Korintonan 2:10-11 ta indiká e

inteligensia di Spiritu Santu: “*Pasobra e Spiritu ta investigá tur kos, asta e profundidatnan di Dios. Pasobra ta ken konosé e pensamentunan di hende sino e hende su spiritu ku ta den dje? Asina tambe ningun hende no konosé e pensamentunan di Dios, sino e Spiritu di Dios.*” Ta solamente un ser inteligente ku por “*investigá*” algu òf “*konosé e prementunan*” di un otro ser.

E di dos karakteristika esensial di personalidat ta boluntat. Ta opvio for di Skritura ku Spiritu Santu tin un boluntat. Segun 1 Korintionan 12:11, Spiritu Santu ta duna donnan “*manera E kier*”. E ta disidí kua don E ke duna na ken...un akto di Su boluntat. Echunan 16:7 tambe ta laga sa ku Pablo a purba ministrá na Bitinia, ma ta parse ku Spiritu Santu no tabata ke esei. E teksto ta bisa ku “*Spiritu di Jesus no a pèrmití nan*”.

Un otro karakteristika esensial di un person ta emoshon. Den Skritura nos por mira ku Spiritu Santu ta demonstrá emoshon. Den Isaias 63:10 i Efesionan 4:30, Spiritu Santu ta demonstrá tristesa. Romanonan 15:30 ta laga sa ku Spiritu Santu ta stima. Maske amor genuino ta perinsipalmente un desishon, no prinsipalmente un sintimentu, ta un echu ku emoshon ta parti di stimashon.

f. Spiritu Santu ta hasi loke personanan so por hasi—demonstrando ku E ta un persona. Ripará e siguiente lista largu di kos ku Spiritu Santu ta hasi—ku solamente un persona ta hasi. Spiritu Santu ta move (Génesis 1:2), ta papia (Echunan 8:29; 10:19; 13:2; 20:23; 21:11; Galationan 4:6; Revelashon 2:7; 22:17), ta hasi petishon (Romanonan 8:26), ta duna testimonio (Juan 15:26), ta instruí (Nehemias 9:20; Lukas 12:12; Juan 14:26; 16:13-15; 1 Korintionan 2:13; 1 Juan 2:27), ta rekordá (Juan 14:26), ta apuntá (Echunan 13:2), ta taha (Echunan 16:6-7), ta ordená (Echunan 20:28), ta konvensé (Juan 16:8), ta konsolá (Echunan 9:31), ta guia (Lukas 2:27; Juan 16:13; Romanonan 8:14; Galationan 5:18), ta sigurá (Echunan 20:23), ta pensa (Echunan 15:28), ta investigá (1 Korintionan 2:10), ta komprendé (1 Korintionan 2:11), ta inspirá (2 Pedro 1:21), ta tende (Juan 16:13), ta stima (Romanonan 15:30), ta lucha (Génesis 6:3), ta yuda (Romanonan 8:26), ta seya (Efesionan 4:30), i ta boutisá (1 Korintionan 12:13). Klaramente esakinan ta kosnan ku un persona ta hasi—no un bientu, poder, influensia òf asta spoki. I sin duda, e lista no ta kompleto! Esakinan sin duda ta demonstrá e personalidat di Spiritu Santu.

g. Por último, e echu ku por trata Spiritu Santu manera un persona tambe ta un indikashon ku E ta un persona—ku E tin personalidat. Un persona por hasi lo siguiente solamente kontra un persona—no un energia òf influensia. Hende por insultá Spiritu Santu (Hebreonan 10:29), resistí kontra Spiritu Santu (1 Tesalonisensenan 5:19), blasfemá (papia kontra) Spiritu Santu (Mateo 12:31-32), purba gaña Spiritu Santu (Echunan 5:3-4), pone Spiritu Santu na prueba (Echunan 5:9), hasi Spiritu Santu tristu (Isaias 63:10; Efesionan 4:30), rebeldiá kontra Spiritu Santu (Salmo 106:33) òf resistí kontra Spiritu Santu (Echunan 7:51). E echu ku por hasi e kosnan aki solamente pa ku un persona ta demonstrá ku Spiritu Santu ta un persona.

Pakiko gasta tantu tempu ku evidensia ku Spiritu Santu ta un persona? R. A. Torrey tabatin un bon kontesta: “Si Spiritu Santu ta un persona divino i nos no sa, nos ta hòrta for di un Ser divino e stimashon i adorashon ku E ta meresé. Ta di suma importansia praktiko (pa nos sa) si Spiritu Santu ta un poder ku nos, den nos ignoransia i debilidad...mester haña i usa, òf si Spiritu Santu ta un persona...ku mester haña nos i usa nos. ...hopi hende por testifiká di e bendishon ku a bin den nan bida ora nan a bin konosé Spiritu Santu, no solamente komo un influensia grasioso...ma komo un kerido amigu i yudadó ku semper ta presente.”

Pasobra Spiritu Santu ta un persona, nos por tin un relashon personal kun’E i nos por tin komunion kun’E den orashon! O, no laga nos trata e kerido Spiritu Santu manera un un obheto, un kos ku nos por usa! Laga nos desaroyá un relashon íntimo kun’E, siña konos’E, komprend’E i stim’E, i pèrmití E pa usa nos!

## B. E DIVINIDAT DI SPIRITU SANTU

Nos a hasi e pregunta, “Kiko Spiritu Santu ta?” Awor nos ta pasa pa e siguiente pregunta, “Ken Spiritu Santu ta?”

Awor ku nos a kaba di komprendé ku Spiritu Santu ta un persona, ta importante pa nos tuma e di dos stap den nos komprendementu i realisá ku Spiritu Santu ta un ser divino...ku E ta Dios. Pues, E ta un persona divino.

Ta mas fásil pa proba e divinidat di Dios Tata i Dios Yu ku pa proba e divinidat di Spiritu Santu. Den Skritura, e divinidat di e Tata simpelmente ta presentá. Beibel no ta hasi ningun esfuerso pa *proba* ku e Tata ta Dios! Den Palabra di Dios, e divinidat di e Yu ta afirmá i probá. Por ehèmpel, apòstel Juan a skirbi su Evangelio pa *proba* ku Hesus ta Dios! Ma e divinidat di Spiritu Santu no ta asina kla. Ningun apòstel a skirbi un Evangelio pa proba ku Spiritu Santu ta Dios. No tin ningun teksto ku ta bisa *dirèkt* ku Spiritu ta divino. P’esei nos mester *dedusí*—saka nos sòm—ku Spiritu Santu ta Dios. Ma tin vários evidensia ku ta pusha nos den direkshon pa yega na e konklushon ei! Laga nos mira sinku evidensia di esei:

1. Den diferente teksto, “Spiritu Santu” por wòrdu interkambiá pa “Dios”. Bisá di un otro forma, den algun teksto, Spiritu Santu ta yamá Dios na un manera indirèkt. Maske e tekstonan aki no ta bisa kla kla ku Spiritu Santu ta Dios, nan ta tekstonan klave. Laga nos mira e tekstonan aki:

Den Echunan 5:3, Pedro ta bisa Ananias ku el a purba “*gaña Spiritu Santu*”. E siguiente vèrsíkulo (5:4) ta elaborá riba 5:3. Pedro ta splika Ananias, “*No ta hende bo a gaña, sino DIOS*”. Klaramente den Pedro su pensamentu, si bo ta gaña Spiritu Santu, bo ta gaña Dios, pasobra Spiritu Santu ta Dios.

Dos teksto den 1 Korintionan ta duna di konosé ku kurpa di e kreyente ta “*tèmpel di Dios*” (3:16-17). Ora Pablo ta splika ken ta Esun ku ta biba den e tèmpel di Dios, nos lo pensa ku e lo bisa ku Dios ta biba den e tèmpel. Na lugá di esei, el a bisa ku “*Spiritu di Dios ta biba den boso*”. Ademas, si nos no a komprendé ya kaba for di e splikashon ei ku Spiritu Santu ta Dios, Pablo a regresá na e mésun tópiko atrobe den 6:19-20. Akinan, e kurpa ku el a yama “*tèmpel di Dios*” awor e ta yam’è “*tèmpel di Spiritu Santu*”. Ta opvio, Pablo no ta hasi distinshon entre Dios i Spiritu Santu. Ademas nos por bisa ku e kreyentenan ta tèmpel di Dios pasobra Spiritu Santu ta biba den nan! E echu ku Spiritu Santu ta biba den e kreyente ta hasi e kristian su kurpa tèmpel di Dios. Efesionan 2:22 ta laga sa ku e kreyente “*ta un lugá-di-biba pa Dios den (pa medio di) Spiritu*”

Dos Korintionan 3:17-18 ta un otro teksto importante. Nos por hasi dos opservashon aki. Ora Tèstament Bieu a wòrdu tradusi na griego (LXX), YHWH (Yehová òf Yahweh na idioma hebreo) a wòrdu tradusí KURIOS (idioma griego). Pues, por lesa 3:17 asina: “*Awor YHWH ta e Spiritu*”. Den otro palabra, Spiritu Santu ta Yehová/Yahweh. Vèrsíkulo 18 ta klousurá ku e palabranan, “*manera dor di e Spiritu di Señor*”. E palabranan aki ta tradusí diferente manera den tradukshonnan ingles: “komo di Señor, e Spiritu” (NASB); “ku ta bin di Señor, ku ta e Spiritu” (NIV); “[pasobra esaki ta bin] di Señor [kende ta] e Spiritu” (Amplified); “asta komo di Señor e Spiritu” (RV) i “pasobra esaki ta bin di Señor kende ta e Spiritu” (RSV, ESV). Loke nos por dedusí di esaki ta ku Spiritu Santu ta yamá “Señor” (òf vise versa) aki.

Nos ya kaba a referí na 1 Korintionan 2:10-11: “*Pasobra e Spiritu ta investigá tur kos, asta e profundidatnan di Dios. Pasobra ta ken konosé e pensamentunan di hende sino e hende su spiritu ku ta den dje? Asina tambe ningun hende no konosé e pensamentunan di Dios, sino e Spiritu di Dios.*” Nos ta aseptá ku e spiritu di un hende ta e hende. P’esei no ta un eksagerashon pa aseptá ku “Spiritu di Dios” lo mester ta Dios!

Juan 4:24 simpelmente ta bisa, “*Dios ta Spiritu*”. Ta bèrdat ku nos por usa e teksto aki pa deskribí e atributo di Dios ku maske E ta un Ser invisible, E ta real. Ma talbes nos tambe por argumentá ku e teksto aki ta komuniká ku Dios ta Spiritu (Santu). Tur kos ta dependé kon nos ta interpretá e teksto aki.



2. Spiritu Santu tin atributonan divino, demonstrando ku E ta Dios. Den un estudio di atributonan (karakteristikanan òf kalidatnan) di Dios, teólogoan ta lista dos tipo di atributo ku Dios tin. Un sorto ta atributonan natural. Esakinan ta atributonan ku e úniko ser ku por tin nan ta Dios. Ma tambe tin un otro tipo di atributo—atributonan moral. E atributonan aki ta kalidatnan ku hende tambe por demonstrá, maske nan no por reflehá nan perfektamente manera Dios ta hasi. (Por haña splikashon muchu mas amplio tokante atributonan di Dios den un estudio tokante e doktrina di Dios.) Nos lo mira tur dos kategoria di atributo. Ma ta bon pa bisa ku e atributonan natural ta e atributonan ku ta duna mas prueba ku Spiritu Santu ta divino.

a. Atributonan Natural

Spiritu Santu ta etèrno. Hebreonan 9:14 ta yam’E “*e Spiritu etèrno*”. Tin solamente ún Ser ku ta bèrdaderamente etèrno: Dios. E echu ku Spiritu Santu tin e atributo aki ta evidensia ku E mester ta Dios!

Spiritu Santu ta omnisiente—E sa tur kos. Isaias 40:13-14 ta hasi algun pregunta retórik—preguntanan ku e kontesta ta mas kla ku di dia: “*Ta ken a dirigí e Spiritu di SENOR, òf a instruiE komo Su konsehero? Ta ken El a konsultá i ta ken a dun’E komprendementu? Ta ken a siñ’E den e kaminda di hustisia i a siñ’E konosementu, i a instruiE e kaminda di komprendementu?*” E implikashon di e preguntanan retórik ta ku Spiritu Santu sa tur kos kaba. Klaramente, Spiritu Santu no tin mester di instrukshon, pasobra E ta Dios. Juan 14:26 i 16:13 ta indiká ku Spiritu Santu lo siña e apòstelnan tur kos. E mester sa tur kos pa e por instruí nan den tur bèrdat. Segun 1 Korintionan 2:10-11, “*...Spiritu ta investigá tur kos, asta e profundidatnan di Dios...*” Echunan 1:16 ta indiká ku E sa adelantá kiko lo sosodé. Kòrdando ku Spiritu Santu sa tur kos, nos por realisá ku no tin nada skondí pa Spiritu Santu—sea ta bon òf malu! Ta bon pa nos kòrda ku nada di bo persona ta skondí pa Spiritu Santu. E sa tantu loke ta bon komo loke ta malu!

Spiritu Santu ta omnipresente. David a realisá ku E ta tur kaminda. El a hasi algun pregunta retótiko: “*Na unda mi por bai for di Bo Spiritu? Òf na unda mi por hui bai for di Bo presensia? Si mi subi na shelu, Bo ta einan; si mi habri mi kama den Seol, mira, einan tambe Bo ta!*” Lukas 12:11-12, Juan 14:17, Romanonan 8:9,26 i 1 Korintionan 3:16 ta indiká ku Spiritu Santu ta biba den tur kreyente i ta obra den nan.

Spiritu Santu ta omnipotente—E tin tur poder. Maria no por a komprendé kon tabata pusibel p’è sali na estado debí ku e tabata un birgen. Den Lukas 1:35, e angel a splik’E ku “*Spiritu Santu lo bin riba bo i poder di e Haltísimo lo sombrero*”. Segun reglanan di interpretashon di poesia hebreo (paralelismo sinónimo), nos por dedusí ku Spiritu Santu ta igual ku e Haltísimo. El a sigui splika den 1:37 ku “*...pa Dios nada lo no ta imposibel.*” Zakarias 4:6 ta laga sa ku forsa humano no ta sufisiente poderoso pa logra Dios Su proposito—solamente forsa divino por hasi esei: “*No pa medio di forsa, ni pa medio di poder, ma pa medio di Mi Spiritu*”. Den Romanonan 15:19, Pablo a rekonosé ku loke a wòrdu kumplí dor di su ministerio tabata pa medio di poder di Spiritu Santu. Ademas, Job 33:4 i Salmo 104:30 ta indiká ku Spiritu Santu a krea...i esei ta algu ku Dios so por hasi!

Spiritu Santu ta soberano—E ta hasi i deshasí manera E ta haña ta bon. Den e buki di Echunan, Spiritu Santu tabatin outoridat pa mata Ananias i Safira (5:1-9), pa kita Felipe for di un ministerio eksitoso i mand’è pa bai den desierto pa papia ku ún persona (8:26-39) i pa dirigí apòstel Pablo i su kompañeronan den e direkshon ku E tabata ke pa nan bai. Tambe 1 Korintionan 12:11 ta laga sa ku Spiritu Santu tin e outoridat pa duna donnan spiritual manera E ta deseá.

Ademas, Spiritu Santu ta bida. Romanonan 8:2 ta yam’E “*...e Spiritu di bida den Cristo Jesus.*”

E echu ku Spiritu Santu tin atributonan natural—atributonan ku Dios so por tin—lógikamente ta indiká ku Spiritu Santu mester ta Dios. Ma nos ke mira otro atributo tambe.

b. Atributonan Moral

Laga nos mira algun atributo moral ku Spiritu Santu ta poseé. Klaramente E ta santu. E ta yamá Spiritu *Santu* mas òf ménos 90 biaha den Tèstament Nobo i Romanonan 1:4 ta

yam'E "*e Spiritu di santidat*". Tambe, Spiritu Santu ta yamá "*e Spiritu di bèrdat*" den Juan 16:13 òf, segun 1 Juan 5:7, "*e Spiritu ta e bèrdat*". Méskos ku Hesus ta bèrdat pasobra E ta Dios (Juan 14:6), igualmente Spiritu Santu ta bèrdat siendo Dios. Un otro atributo, stimashon, ta mensioná den Romanonan 15:30: "*Amor di Spiritu*". Tambe Nehemias 9:20 i Salmo 143:10 ta enfatisá e bondat di Spiritu Santu, yamando E "*Bo bon Spiritu*"

3. Spiritu Santu ta hasi obranan divino, demonstrando ku E ta Dios. Nos ta mira den Skritura diferente obra ku Spiritu Santu ta hasi: El a krea (Jòb 26:13; 33:4; Salmo 104:30), El a duna bida (Juan 6:63; Romanonan 8:11), Spiritu ta regenerá—duna bida spiritual (Juan 3:5-6), E ta hustifiká (1 Korintionan 6:11), i e di tres miembro di e Trinidad tambe ta santifiká (1 Korintionan 6:11; 2 Tesalonisensenan 2:13). Segun Juan 16:8, Spiritu Santu ta konvensé di piká. Esei por parse un obra ku kualke persona por hasi. Ma Spiritu Santu ta e úniko ser ku por konvensé e persona i produsí kambio duradero den Su bida.

Ademas, nos no por lubidá ku Spiritu Santu a inspirá. Den Echunan 28:25 Pablo a duna di konosé ku "*Spiritu Santu a papia pa medio di profeta Isaias ku boso tatanan*". Pedro a papia kla tokante Spiritu Santu Su parti den inspirashon den 2 Pedro 1:21, "*...nunka profesia no a wòrdu duná pa medio di e boluntat di hende, ma hòmbènan santu di Dios a papia, inspirá dor di Spiritu Santu.*" Nos ta di akuerdo ku Dios ta Outor di Beibel. Pues, si Beibel ta inspirá dor di Spiritu Santu, nos mester konkluí ku Spiritu Santu ta Dios.

4. Spiritu Santu ta partisipá den un relashon divino, indikando ku e ta divino. Nos ya kaba a usa e mesun argumento aki pa demonstrá ku Spiritu Santu ta un persona pasobra E ta asosiá ku e otro personanan di Trinidad.

a. Spiritu Santu Su asociashon ku e Tata. Den Gènesis 1:2 i 1 Korintionan 2:11, Spiritu Santu ta yamá "*e Spiritu di Dios*". Lògikamente, spiritu di hende lo ta hende. Igualmente, Spiritu di Dios mester ta Dios. E Tata ta yam'E "*Mi Spiritu*" (Gènesis 6:3). Tambe, E ta yamá "*e Spiritu di nos Dios*" (1 Korintionan 6:11), "*e Spiritu di e Dios bibu*" (2 Korintionan 3:3), "*Spiritu Santu di Dios*" (Efesionan 4:30), i "*Spiritu di boso Tata*" (Mateo 10:20).

b. Spiritu Santu Su asociashon ku e Yu. Algun hende ta di opinion ku bo ta risibí Spiritu di Hesus ora bo ta kombertí (1 Juan 4:2; Romanonan 8:9). Ma ora bo ta risibí e boutismo di Spiritu, e ora ei numa bo ta risibí Spiritu Santu. Esei no por ta bèrdat pasobra tin ún Spiritu Santu so...no dos! (1 Korintionan 12:11,13; Efesionan 2:18; 4:4). Spiritu Santu ta Spiritu di Kristu i vise versa.

Spiritu Santu a hunga un ròl importante na nasementu di Hesus. E angel Gabriel a splika birgen Maria, "*Spiritu Santu lo bin riba bo, i e poder di e Haltisimo lo sombrabo; i pa e motibu ei Esun Santu ku tin ku nase lo wòrdu yam e Yu di Dios*" (Lukas 1:35). Esun ku Spiritu Santu a engendra ta Dios! Solamente bestia por engendrá bestia, solamente hende por produsí hende, i igualmente solamente Dios por engendrá Dios. Lògikamente, Spiritu Santu mester ta Dios si Hesus ta Dios.

Spiritu Santu tambe tin nòmbernan relashoná ku Hesus. E ta yamá "*Spiritu di Kristo*" (Romanonan 8:9-10), "*e Spiritu di Hesus*" (Echunan 16:7), "*e Spiritu di Su Yu*" (Galationan 4:6), i "*e Spiritu di Hesu-Kristo*" (Filipensenan 1:19).

Nos a ripará ku Spiritu Santu ta idéntiko ku Hesus. E apòstèlnan tabata preokupá pasobra Hesus a bisa nan ku nan tabata bai pèrdè Su presensia fisiko. Ma El a agregá ku E mes ta bolbe serka nan (Juan 14:16-18). Nos ta kòrda ku Hesus a usa e palabra griego ALLOS (otro, pero idéntiko) na lugá di HETEROS (kompletamente otro) ora El a bisa nan ku e Tata "*lo duna boso un otro Konsolador*" (14:16). Si Hesus ta Dios, i Esun ku E ta pidi e Tata pa manda ta idéntiko kun'E, nos ta konkluí ku Spiritu Santu tambe ta Dios.

Komparando blasfemia kontra Spiritu Santu ku balsfemia kontra Hesus (Mateo 12:31-32) ta un otro punto ku nos a mira. Segun e teksto ei, blasfemia kontra Spiritu Santu ta pió ku blasfemia kontra e Yu di Dios! Si Spiritu Santu no ta Dios, esei ta nifiká ku ta mihó pa

blasfemá Dios ku pa blasfemá un kriatura ku no ta Dios! Nos tin ku konkluí ku òf e splikashon ei ta lokura òf Santu ta Dios!

c. Spiritu Santu Su asosashon ku e Trinidad. Den nos estudio tokante e personalidat di Spiritu Santu nos a argumenta ku solamente un persona por tin kontakto será ku otro persona, ku Spiritu Santu tin kontakto será ku e otro dos personanan di Trinidad, i ku p’esei nos por dedusí ku Spiritu Santu tambe mester ta un persona

Awor nos lo usa e mésun argumento pa ku Spiritu Santu Su divinidat. Solamente un persona divino por tin kontakto será ku un otro persona divino. Spiritu Santu tin kontakto sera ku e otro dos personanan divino di Trinidad. P’esei nos ta desusí ku Spiritu Santu tambe mester ta un persona divino. Den otro palabra, si e Tata i e Yu ta divino, ta lógiko ku e otro persona ku ta asosí ku nan tambe mester ta divino!

Si Spiritu Santu no ta Dios, anto e instrukshon di Mateo 28:19, pa batisá “*den nòmber di e Tata i di e Yu i di e Spiritu Santu*“ lo ta ridíkulo. Lo ta igual pa bisa pa batisá den nòmber di e Tata i di e Yu i di biento òf influensia. Òf, mirá di un otro ángulo, lo ta méskos pa instruí nan pa batisá hende den nòmber di e Tata i di e Yu i di Moisés (òf Pablo òf pastor, èts.). Lógikamente, esei no ta kuadra. Pasobra Spiritu Santu ta Dios, p’esei E ta forma parti di e Trinidad! Otro tekstonan ku tambe ta mensioná tur tres persona di e Trinidad huntu (Mateo 3:16-17; Juan 15:26; Echunan 2:33; Romanonan 15:16; 1 Korintionan 6:11; 12:4-6; 2 Korintionan 1:21-22; 13:13; Efesionan 3:14-16; 2 Tesalonisensenan 2:13-14; Hebreonan 9:14; 1 Pedro 1:2; Judas 20-21). Den hopi di e tekstonan aki, nos por nota ku onor divino ta duná na Spiritu Santu huntu ku e otro dos personanan di e Trinidad.

5. Spiritu Santu den Skrituranan kompará. Ora nos ta kompará diferente Skritura ku otro, ta visto ku Spiritu Santu ta igualá ku Dios.

Den Isaias 6:8-10, “Señor” ta papia. (E palabra hebreo usá pa “Señor” ta e palabra ADONAI.) Pablo a sita e teksto aki i a laga sa ku Esun ku tabata papia den Isaias 6:8-10 tabata Spiritu Santu: “*Ku rason Spiritu Santu a papia pa medio di profeta Isaias ku boso tatanan, bisando...*” Pues, Pablo a igualá Spiritu Santu ku ADONAI...Dios.

Hebreonan 3:7-9 ta laga nos sa ku “*Spiritu Santu ta bisa*” e mensahe ku ta sigui. Loke ta sigui ta un sita tumá for di Salmo 95:7-11. Den Salmo 95, klaramente ta Dios ta papia. Pues, for di esei nos por dedusí ku Spiritu Santu ta igualá ku Dios. Ma ta interesante pa bai un tiki mas leu. Nos no sa presís na ki tempu e tekstonan aki ta papia. Ta pusibel ku e tekstonan ta referí na e eventonan mensioná den Eksodo 17:2-7 òf Ekstodo 16:7. Ta interesante ku Eksodo 17:2 ta hasi pregunta, “*Pakiko boso ta pone SEÑOR (YHWH) na prueba?*” Esei lo nifiká ku Spiritu Santu ta igual ku YHWH (Yehová, Yahweh).

Un otro teksto ku ta muestra den direkshon ku Spiritu Santu ta YHWH ta Jeremias 31:31-34. Den e teksto aki, klaramente “*SEÑOR*” (YHWH) ta papia. Hebreonan 10:15-17 ta referí bèk na Jeremias 31 i ta bisa ku Spiritu Santu a papia esei!

Segun Isaias 63:10, “*Ma nan a rebeldiá i a hasi Su Spiritu Santu tristu...*” Ta interesante pa nota ku ningun teksto den Pentatuk (ku ta konta tokante tempu ku Israel tabata dwal den desierto) ta bisa ku e rebeldia i murmurámentu di Israel a ofendé Spiritu Santu. Ma ta mashá visto ku Israel a ofendé Dios (Eksodo 16:7-8; 17:2-7). Klaramente Isaias a konsiderá ku Spiritu Santu ta Dios pa e skirbi esei.

Génesis 1:27 a duna di konosé ku “*...Dios a krea hende...*” E palabra hebreo usá pa “Dios” einan ta e palabra ELOHIM. Pues, segun e teksto hebreo, ELOHIM a krea hende. Esei ta notabel pasobra Jòb ta bisa “*Ta e Spiritu di Dios a trahami...*” (Jòb 33:4).

Promé ku nos ta bandoná nos estudio di e naturalesa di Spiritu Santu, ta bon pa nos poua i pensa tokante algun implikashon ku e siñansa aki tin pa ku nos bida.

Pa di promé, si Spiritu Santu ta solamente un poder, e poder ei ta na bo disposishon pa us’é manera bo ta haña ta bon. Ma si Spiritu Santu ta un persona—i mas ku esei, si E ta un persona divino—anto nos (abo i ami) mester ta na Su disposishon, kla pa hasi loke E ta deseá!

Komo Spiritu Santu ta 100% divino, nos mester dun'E e mésun onor i respèt ku nos ta duna e Tata i Yu! Maske Spiritu Santu ta someté na e Tata i Yu, E no ta inferior ku e Tata i Yu! E ta digno pa risibi adorashon, méskos ku e Tata i Yu. (Nos mester mantené den nos pensamentu e echu ku Spiritu Santu Su meta ta pa halsa Hesus, i pues, atenshon demasiado pa ku Spiritu Santu ta desonr'E.)

Un di tres implikashon ta ku Dios no ta leu di hende. Pa medio di Spiritu Santu e Trinidad ta serka. Di bèrdat Dios ta mas serka nos awor ku durante tempu ku Hesus a kamna riba mundu den Su inkarnashon! E tempu ei, Hesus tabata Emanuel, "Dios ku nos." Awor, Dios no solamente ta ku nos. E ta *den* nos pa medio di Spiritu Santu.